

INUIT ATAQATIGIIT

INATSISARTUNI



EM 2015 / 119.1

15. oktober 2015

Naaja H. Nathanielsen

**Uunga siunnersuut: Kalaallit Nunaata Aatsitassarsiornermi Aningaasaateqarfia
pillugu Inatsisartut inatsisaata allanngortinnissaa pillugu Inatsisartut inatsisaat
nr. xx, yy. 2015-imeersoq.**

(§ 50-imi atuutilernissaanut piumasaqaatit allanngornerat)

(Aningaasaqarnermut Aatsitassanullu Naalakkersuisoq)

Aatsitassarsiornermi Aningaasaateqarfiliornissaq 2008-mi ataatsimoorluni aalajangiussaavoq. Tamatuma kingorna inatsisip allanngortinnejarnissaanik kissaatit tutsiutillattaalerput. Tamakkulu kissaatit politikkikkut naliginnaasumik tapersersugaallutik. Aningaasaateqarfiup atorunnaarsinneqarnissaanik oqaluttoqaranilu, aningaasaateqarfiup aningaasanik imaanik atuiletornerujumanermik kissateqartoqanngilaq. Siunnersuutaasartuni tamani piumasarineqarpoq erseqqissarneqassasoq qaqugu aningaasaateqarfik atuutilissanersoq, aningaasaateqarfiullu aningaasaatigilerumaagai qanoq atorneqarsinnaanersut. Aningaasaateqarfissap siunertaa tassaasoq, aningaasaateqarfiup aatsitassarsiornermit isertikkumaagai ingerlaannartumik atorneqaratik paarilluarneqassasut taakkulu kinguaatta atugarrioratik inuuneqarnissaannut qulakkeerutaassasut, kikkunnilluunniit apeqquserneqanngilaq.

Ukiut ingerlanerini Inatsisartuni ataatsimiititaliat nunanut aatsitassarsiornermi aningaasaateqarfiusunut aningaasaateqarfiunngitsunulluunniit tikeraartarput. Taamatut angalagaangatta politikerit allat aatsitassarsiornermillu suliaqartut tamanna pillugu oqaloqatigisarpavut. Tamakkulu tamarmik inassutigisartagaat paatsuugassaanngitsoq tassaavoq: aningasat takkutiinnartullu atorniaqinasigit, siunissamut aamma toqqorterigisi.

Inatsisartut ataatsimiinnermi matumani Aatsitassarsiornermi Aningaasaateqarfik pillugu inatsimmut allannguutissanik pingasunik, inuit Ataqatigiit siunnersuutigisaannik, aalajangiussaqareerput. Tamakku saniatigut allannguutissatut siunnersuut massakkut eqqartugarpot Naalakkersuisunit saqqummiunneqarpoq. Naalakkersuisut siunnersuutaat Inuit Ataqatigiinniit siunnersuutitta ilaannut assingulluinnarpoq.

Inatsisartut qanittunnguami aalajangerpaat Aatsitassarsiornermi Aningaasaateqarfik aatsaat pilersinneqassasoq, Nunatta karsiata naatsorsuutai naapertorlugit aatsitassarsiornermi ukiumut 10 mio.kr.-nit sinnerlugit isertitaqarsimanera, Inatsisartuni ukiuni tulleriinni marlunni uppernarsineqarluni akuerineqareerpat. Naalakkersuisulli

siunnersuutaanni Aningaasaateqarfiup siusinnerusukkut pilersinneqarsinnaanera ilangunneqarsimavoq, tamanna Naalakkersuisut kissaatigippassuk. Oqaasertaliussani soq taamatut ilangussaqarsimaneq nassuaasersorneqanngilaq, oqaaseqatigiit pineqartut Inatsisartut aalajangiussimasaannut naapertuitinngitsut soq ilangunneqarsimanersut. Taamaattumik Naalakkersuisut soq taamatut ilangussaqarsimanerlutik nassuaateqarnissaat kissaatigaarput.

Tusarniaavagineqarsimasut arlallit Inuit Ataqatigiinnit isumaqatigaavut, isumaqarmata Inatsisip nutarterneqarnera ataatsikkut suliarineqartariaqartoq, kittaartumik pinnagu. Taamaattumik siunnersuutigaarput Naalakkersuisut siunnersuutaat manna kinguartinneqarallassasoq, taarsiullugulu Inatsisisstatut siunnersummik, Inatsisartuni inatsimmut allannguutissatut isumaqatigiissutaareersut ilangullugit saqqummiussisoqassasoq. Inuit Ataqatigiinni tusarniaavagineqarsimasut aamma isumaqatigaavut, inatsisisstatut siunnersuut tamakkiisoq Aningaasaqarneq pillugu Siunnersuisooqatigiinnut oqaaseqarfigitinneqartariaqartoq isumaqarmata.

Tamakku tunngavigalugit siunnersuut manna itigartinniarparput, kissaatigalugulu inatsimmik nutarterineq pissasoq allannguutissatut aalajangiussaareersut ilangullugit. Maluginiarparput allannguutissatut kissaatigineqartut arlallit siusinnerusukkulli inatsisisstatut siunnersuutit saqqummiunneqareernikuusut, qinersinerilli pissutigalugit maanngaannarsimallutik. Taamaammat naqqaniit aallarteqqinnissaq pisariaqanngilaq. Toqqartaatini allakkiat nassaareriaannaapput taakkulu tunngavigalugit suliaq nanginnejqarsinnaavoq.

Inuit Ataqatigiinni nalunngilarput Naalakkersuisut siuliini, taamani Inatsisartuni allannguutissatut siunnersuutit aalajangiussaasullu, akerlerineqartut. Taamaammat massakkut Aatsitassarsiornermut Naalakkersuisusosq qinnuigaarput erseqqissumik nalunaarutigeqqullugu, Inatsisartut allannguutissatut aalajangiussaat naapertorlugit allannguutissat suliariniarlugit tamannalu salliutiinnarlugu, maanaannaq qinersisoqariasarneratigut naallerneqaqqeqqunata.